





C. 21-1





H. 1734

Nc. Levesq

COPPIE D'V-

NE LETTRE DV SIEVR

D'AYMALE, AV SIEVR MAR-

quis d'Elboeuf son frere, sur l'asso-

ciation qu'ils deliberent faire con-

tre la maison de Montmorency.

(3)

M. D. L X V.

THE NEWBERRY
LIBRARY

Case

F

39

1326

15652

COPPIE DVNE LETTRE

DV SIEVR D'AVMALE AV

Sieur Marquis d'Elbœuf son frere,
 sur l'association qu'ils deliberent
 faire contre la maison de Mōtmo-
 rency.

MON frere, ainsi que i'estois sur
 mon chemin pour m'en aller
 à Anet, i'ay receu de vostre hom-
 me la lettre que m'avez escripte: à la-
 quelle ie ne vous ay peu respondre
 que ie ne fusse de retour de ce voya-
 ge en ce lieu: tant pour ce que i'auois
 enuie de sētir premieremēt en quelle
 volonté ie trouuerois la Noblesse de
 Normandie, qu'aussi que ie voulois
 bien entendre deuāt, cōme les choses
 que sçauiez, auoyent esté prinſes à la
 Court, à fin de les vous mander, com-
 me maintenant ie puis & les vous
 veux dire, ayant eu en m'en reuenāt
 icy, & estant lors à Rouen, deux des-

pesches coup-sur-coup du Roy & de la Roine : L'une & la premiere par le Cheualier de Seure, qui ne pésoit pas à son partement de la Court me venir trouuer là.

Les aduertissements qu'on auoit donnez à leurs Maiestez, estoient entre autres choses, Que l'Admiral & le Mareschal leur auoyent escript, que ce qu'il les auoit assemblez à Paris, n'estoit à autre occasion, que pour les courses que ie faisois là alentour, tantost à sainct Denis, à Meudon, & aussi tantost à Carrieres & Dampierre: & auéc de telles forces, qu'ils asseuroient leurs Maiestez, que sans eux & la presence de leurs amis en ladicte ville, ie l'eusse surprinse ou grâdemēt troublee. Et auoyent tellement imprimé en ceste Court là telles mēteries, qui sont toutes pures & vrayes, (n'ayant dès ce temps là bougé de ce

lieu) que leurs Maieſtez n'en ſçauoyēt
que pēſer. Et pource aduiſerēt d'en-
uoyer lediēt Cheualier de Seure, tant
à moy qu'à eux. A moy, pour me
prier de continuer en la prudence &
ſageſſe que i'auois monſtreē lors de
ce qui fut faiēt à Mōſieur le Cardinal,
dont ils ſe louent grandement, & a-
uoyent bien à m'en remercier: avec
des plus belles parolles du mōde, tel-
les que vous ſçauēz qu'ils ont accou-
ſtumē d'en dōner, les plus marris du
monde du beau faiēt dudiēt Mareſ-
chal. Auquel, & audiēt Admiral il a-
uoit auſſi charge de parler, pēſant les
trouuer encores enſemble en ladiēt
ville: & entre autres choſes de dire
audiēt Admiral, Qu'il euſt à en deſſo-
ger, ou ſil n'en vouloit riē faire, qu'il
diſt à la Cour de Parlemēt qu'elle luy
en feiſt commandement treſexpres,
de l'abandonner au peuple. Et nel'y

ayāt trouué ledict Cheualier, il dōna
(premierement que de venir à moy)
iusques à Chastillon : où, à ce qu'il
m'asseure, il n'oublia pas à luy faire
entendre ce que dessus. Et d'auan-
tage que leurs Maiestez luy mādent,
que d'oresnauant il eust à se contenir
de faire telles assemblees, non seule-
mēt en ladiēte ville, mais en quelque
lieu que ce soit de son Royaume, où
il n'auoit aucun commandement, si-
non du costé de la marine: où, graces
à Dieu, il n'y auoit chose qui se presē-
tast pour ceste heure. Ce qu'il trouua
fort estrange : & fait respōse, que, à ce
qu'il voyoit, on ne luy sçauoit aucun
gré de ce qu'il auoit faict. Qu'il n'e-
stoit pas à cognoistre cōbien la Roi-
ne auoit de mauuaise volonté à luy
& à sa Religion: qu'elle faisoit tout ce
qu'elle pouuoit pour le ruiner : Que
ce qu'il auoit mené audict Paris, n'e-

ſtoit que ſon couſin le Mareſchal, qui
cōme Lieutenāt du Roy, l'auoit man
dé pour le ſeruice de ſa Maieſté. Ce
que ledict Mareſchal cōfirma audict
Cheualier: & luy dict d'auantage, que
quant à enuoyer deuers leurs Maie-
ſtez ſoubs la Planche, ainſi qu'ils luy
mandoyent par luy, comme auſſi fai-
ſoit ſon pere, qu'il n'en feroit rien: &
qu'il vouloit que le Roy aduouaſt
que ce qu'il auoit fait, eſtoit pour ſon
ſeruice. Et ſur l'heure meſme, & en
la preſence il deſpeſcha pour ceſte
cauſe là à la Court.

Si c'eſtoit vn autre que ledict Che-
ualier qui m'eufſt rapporté ces pro-
pos là, i'y penſerois deux fois auant
que d'y adiouſter foy: mais i'ay aſſez
d'aſſurance de ſa fidelité. Et ainſi
que ie voulois depeſcher, le Capitai-
ne Artin, que vous cognoiſſez, re-
tournāt de la Court, (où ie l'auois en-

uoyé d'icy pour m'e aller en ce voya
ge,)arriua : qui me rapporte encores
de plus belles parolles de leurs Maie-
stez, apres qu'elles furent par luy as-
seurees, que toutes ces belles courses
mises en auant par lesdicts persona-
ges, n'estoyent que toutes menfon-
ges controuuees : cōme encores de-
puis il leur voulut cōfirmer, voulant
prendre congé de la Roine, deuers
laquelle, comme il auoit sceu le soir
de son parlement, lesdicts bons Sei-
gneurs auoyēt enuoyé Hierosme fils
de Iean de Thurin, pour assurer le
Roy, que ledict Admiral s'estoit reti-
ré en sa maison, apres auoir veu les
forces qu'il disoit que i'auois depar-
ties. Et sur cela ledict Attin ne sou-
blia pas de dire à ladicte Dame en la
presence dudiect de Thurin, que tous
ces beaux aduertissemēts qu'ils don-
noyent, estoyent faulx quant ausdi-
ctes

etes courses: suppliant ladicte Dame luy faire cest honneur, que de le faire mettre, & ledict de Thurin, sous bone & feure garde, à ce qu'ils en eussent plus certain tesmoignage. Et que si ce qu'il disoit n'estoit veritable, qu'il vouloit que sadicte Maiesté luy feist couper la teste: comme aussi audict de Thurin s'il se trouuoit menteur.

Ladicte Dame s'en vouloit contenter, & dict audict Attin qu'il m'asseuraist qu'elle scauoit bien dōt venoyēt les veritez & mēsonges: qu'elle auoit bien cogneu que i'auois tousiours mieux aimé preferer le seruice du Roy & le repos de sō Royaume, que le particulier de nostre maison. En quoy me prioit de vouloir cōtinuer, n'oubliant pas de belles promesses.

Ledit Attin est retourné iusques à moitié du chemin de la Court avec Crenay, que nous auions despesché

premieremēt à ladicte Dame. Il s'en
va trouuer monsieur le Cardinal de
sa part, cōme aussi feray-ie dans cinq
ou six iours : aussi que leurs Maiestez
me prient de me retirer en Champai
gne. Et estans lediēt Seigneur Cardi
nal & moy ensēble, nous aduiferons
ce que nous aurons à faire, dont ie ne
fauldray de vous tenir aduertiy.

Ce pendant, mon frere, & durant
cetemps que vous serez là où vous
estes, ie suis bien d'aduis que vous
voyez monsieur de Montpensier, à
qui i'escris la lettre de creance sur
vous, selon que me mandez. Et ne
sçauriez mieux faire que de regarder
avec luy & les bons Seigneurs nos
bons amis, de là practiquer vne bon
ne association, qui deust estre ferme
& faicte il y a ia long temps, si chascū
de son costé y eust mis peine. I'en
sçay qui l'ont mise en auant, & puis

quand c'a esté au faict & au prendre,
ils ont seigné du nez, comme aussi en
beaucoup d'autres choses: Et si cha-
cun de son costé y vouloit trauailler,
nous en aurions bien tost vne bon-
ne fin avec les bonnes & belles occa-
sions que nous en auons: Mais ceux
à qui il touche, comme à moy, n'en
font point le cõpte que ie desirerois
bien. Il me fâcheroit fort qu'il ne
tinst qu'à moy: Pour le moins feray-
ie cognoistre le contraire, si Dieu me
preste la vie. Et serois bien marri que
la reputation, que i'ay mis peine d'ac-
querir, en fust pour cela perdue: aussi
i'espere bien que non. I'en ay par
plusieurs fois cy deuãt escript à Mes-
sieurs de Montpésier, d'Estampes, &
Chauigny: par où ils auroyent bien
peu iuger la volõté que i'ay tousiours
euë de nous venger, & combien ie
desirerois l'association que vous di-

tes, preuoyant assez combien elle estoit necessaire non seulement pour nous, mais aussi pour tous les gēs de bien à qui lon en veult plus que iamais.

Et pour ceste cause, mon frere, ie trouuerois merueilleusement bon que lesdicts Sieurs y voulsissent entendre, laissant les villes, d'autant qu'il n'y a nulle asseurāce en peuple, comme ie l'ay dernièrement encores cogneu. Mais avec la Noblesse, de ma part ie suis tout resolu & prest, & n'y veux espargner aucune chose, & le plustost sera le meilleur. Qui me fait vous prier, de regarder & en bien aduiser tous parens ensemble, & mesmes avec le Seigneur de Mōtpensier, & de m'en mander ce que vous aurez deliberé, à fin que par là ie resoluë avec les Seigneurs & Noblesse qui sont de deça, & mes Gouver-

neurs, qui feront tout ce que ie voudray.

Au demeurant, vous auez bien entendu le nombre des Cheualiers de l'Ordre qui ont esté faiçts, qui sont bien pres de trente ou plus, dont monsieur de Brion en est des premiers: Aussi des preparatifs que lon fait à la Court pour aller à Bayonne recevoir & festoyer la Roine d'Espagne. Monsieur d'Orleans doit partir six ou sept iours deuant avec bone troupe de Noblesse.

Je ne veux aussi oublier à vous dire que en faisant ceste lettre, que monsieur de Montpensier a escript audiçt Marechal pour responce à celle qu'il luy auoit escripte de s^{on} beau faiçt: Je vous prie de l'en bien remercier de nostre part, & mesmes de la mencee: encor' que ie le face par la lettre que ie luy escriis, nous en sommes bien

tenus à luy.

Au reste, si vous voyez monsieur l'Euesque du Mans, vous ne sçauriez que bien faire de luy parler de ladicte association, où il seroit bien aise avec ses amis d'y entendre: nous en auons parlé ensemble.

Ce seroit bien fait que vous en escriuiez à monsieur de Martigues, & si vous vous pouuez veoir & en communiquer ensemble, il seroit encores meilleur. Je m'asseure qu'il continue tousiours en la mesme bonne volonté qu'il nous a tousiours portee: aussi se peult-il bien assurer de la nostre, comme luy pouuez trop mieux faire entendre, & que ie signeray tousiours avec lesdicts Seigneurs ce que aurez resolu tous parens ensemble.

Je vous enuoye ce cheuaucheur, à fin que par luy i'entende bien amplement sur ce de vos nouuelles. Il

8
demeurera pres de vous tant que
vous aduiferez, & me reuiēdra trou-
uer en Champaigne.

Du vingtquatrieme Feburier, mil
cinq cens soixante cinq.

F I N.

